Կ ሀ ቦ ዓ

ԿԱՌԱՎԱՐՈՒԹՅԱՆ ՀԱՆՐԱԳՐԵՐԻ ՀԱՐՑԵՐՈՎ ՀԱՆՁՆԱԺՈՂՈՎԻ ԿԱԶՄԱՎՈՐՄԱՆ ԵՎ ԳՈՐԾՈՒՆԵՈՒԹՅԱՆ

- 1. Կառավարության հանրագրերի հարցերով հանձնաժողովը (այսուհետ՝ հանձնաժողով) կազմված է հանձնաժողովի նախագահից և չորս անդամից։ Հանձնաժողովն ունի քարտուղար։
- 2. Հանձնաժողովը կազմավորվում է վարչապետի առաջարկությամբ կառավարության անդամների ներկայացրած թեկնածուներից։ Հանձնաժողովի անհատական կազմը հաստատում է վարչապետը։
 - 3. Հանձնաժողովը հասարակական հիմունքներով մշտապես գործող մարմին է։
- 4. Հանձնաժողովը քննարկում է այն հանրագրերը, որոնք ենթակա չեն որևէ նախարարության իրավասությանը։
- 5. Եթե հանրագրում նշված հարցը ենթակա չէ որևէ նախարարության իրավասությանը, ապա վարչապետի աշխատակազմը հանրագիրը և կից փաստաթղթերը ոչ ուշ, քան դրանք ստանալուն հաջորդող աշխատանքային օրն ուղարկում է հանձնաժողով։
- 6. Հանձնաժողովն իր գործունեության ընթացքում ղեկավարվում է «Հանրագրերի մասին» Հայաստանի Հանրապետության օրենքով և այլ իրավական ակտերով։
- 7. Հանձնաժողովի գործունեությունը կազմակերպվում է նիստերի միջոցով։ Նիստերը հրավիրվում են ըստ անհրաժեշտության։
- 8. Հանձնաժողովի նիստերն իրավազոր են, եթե դրանց մասնակցում է հանձնաժողովի անդամների թվի կեսից ավելին։

- 9. Որոշումներն ընդունվում են հանձնաժողովի անդամների ձայների մեծամասնությամբ։
 - 10. Հանձնաժողովի նախագահը՝
 - 1) ղեկավարում է հանձնաժողովի գործունեությունը.
 - 2) նշանակում է հանձնաժողովի նիստի անցկացման օրը և ժամը.
 - 3) հրավիրում է հանձնաժողովի նիստերը և վարում դրանք.
- 4) անհրաժեշտության դեպքում՝ հանրագրի քննարկումներում ներգրավում է մասնագետների.
- 5) հանձնաժողովի քարտուղարի բացակայության դեպքում նրա պարտականությունների կատարումը ժամանակավորապես հանձնարարում է հանձնաժողովի անդամներից մեկին.
- 6) վարչապետի աշխատակազմին տեղեկացնում է «Հանրագրերի մասին» Հայաստանի Հանրապետության օրենքով սահմանված դեպքերում և կարգով հանրագրին պատասխան ներկայացնելու ժամկետը երկարաձգելու մասին՝ հանրագիրը ներկայացրած անձին ծանուցելու համար.
 - 7) կազմակերպում է հանձնաժողովի ընթացիկ աշխատանքները.
- 8) ստորագրում է հանձնաժողովի որոշմամբ ընդունված հանրագրի պատասխանը, գրությունը, նրա գործունեությանը վերաբերող մյուս փաստաթղթերը.
- 9) «Հանրագրերի մասին» Հայաստանի Հանրապետության օրենքին համապատասխան՝ իրականացնում է իրեն վերապահված այլ լիազորություններ։
 - 11. Հանձնաժողովի անդամը՝
 - 1) մասնակցում է հանձնաժողովի նիստերին.
- 2) հանձնաժողովի նախագահի հանձնարարությամբ՝ վարում է հանձնաժողովի նիստը.

- 3) հանրագրի պատասխանի նախագծերը քննարկելուց հետո մասնակցում է քվեարկությանը՝ քվեարկելով կողմ կամ դեմ.
- 4) «Հանրագրերի մասին» Հայաստանի Հանրապետության օրենքին համապատասխան՝ իրականացնում է իրեն վերապահված այլ լիազորություններ։
 - 12. Հանձնաժողովի քարտուղարը՝
 - 1) նախապատրաստում է հանձնաժողովի նիստերի անցկացումը.
- 2) հանձնաժողովի նիստի անցկացման օրվա և ժամի մասին ծանուցում է հանձնաժողովի անդամներին՝ նիստի անցկացումից առնվազն երկու աշխատանքային օր առաջ.
 - 3) կազմում է նիստերի արձանագրությունները.
- 4) «Հանրագրերի մասին» Հայաստանի Հանրապետության օրենքին համապատասխան՝ իրականացնում է իրեն վերապահված այլ լիազորություններ։
- 13. Հանձնաժողովի քարտուղարը հանձնաժողովի անդամ չէ և չի մասնակցում քվեարկությանը։
- 14. Հանձնաժողովի նախագահի բացակայության դեպքում, նրա հանձնարարությամբ, հանձնաժողովի նախագահի լիազորություններն իրականացնում է հանձնաժողովի անդամ-ներից մեկը։
- 15. Հանձնաժողովի նախագահը հանրագիրն ստանալուց հետո երեք աշխատանքային օրվա ընթացքում հանձնաժողովի անդամներից մեկին նշանակում է տվյալ հարցը զեկուցող։ Հանձնաժողովի նախագահը և անդամները հանրագիրն ստանալուց հետո յոթ աշխատանքային օրվա ընթացքում ներկայացնում են հանրագրի պատասխանի նախագիծ։
- 16. Եթե սույն կարգի 15-րդ կետում սահմանված ժամկետում հանրագրի պատասխանի նախագիծ չի ներկայացվում, ապա հանրագրի պատասխանի նախագիծը երկու աշխատանքային օրվա ընթացքում մշակում և հանձնաժողովի քննարկմանն է ներկայացնում զեկուցողը։

- 17. Հանրագրի պատասխանի նախագիծ մշակած հանձնաժողովի անդամը հանձնաժողովի նիստի անցկացումից առնվազն մեկ աշխատանքային օր առաջ այն տրամադրում է հանձնաժողովի անդամներին։
 - 18. Ներկայացված նախագծերը քննարկվում են հետևյալ կարգով՝
- 1) նախագծերը քվեարկության են դրվում ըստ դրանք ներկայացնելու հաջորդականության.
- 2) մեկ նախագիծ քվեարկության դրված լինելու դեպքում այն ընդունված է համարվում, եթե ստացել է հանձնաժողովի անդամների ձայների մեծամասնությունը.
- 3) եթե քվեարկության է դրվել երկու նախագիծ, և դրանցից ոչ մեկը չի ստացել ընդունման համար անհրաժեշտ թվով ձայներ, ապա առավել շատ ձայներ ստացած նախագիծը նորից է դրվում քվեարկության.
- 4) եթե քվեարկության է դրվել երկուսից ավելի նախագիծ, և դրանցից ոչ մեկը չի ստացել ընդունման համար անհրաժեշտ թվով ձայներ, ապա անցկացվում է քվեարկության երկրորդ փուլ, որի ժամանակ քվեարկության է դրվում առավել շատ ձայներ ստացած երկու նախագիծը.
- 5) եթե մեկից ավելի նախագծեր ստացել են ընդունման համար անհրաժեշտ թվով ձայներ, ապա ընդունված է համարվում առավել շատ «կողմ» ձայներ ստացած նախագիծը.
- 6) եթե մեկից ավելի նախագծեր ստացել են ընդունման համար անհրաժեշտ և հավասար թվով ձայներ, ապա հանձնաժողովի նախագահի ձայնը վճռորոշ է։
- 19. Հանձնաժողովն իր նիստերը պետք է կազմակերպի այնպես, որ «Հանրագրերի մասին» Հայաստանի Հանրապետության օրենքով սահմանված ժամկետում ապահովվի հանրագիր ներկայացրած անձին հանրագրի պատասխանը ներկայացնելը։
- 20. Հանձնաժողովի նախագահը հանձնաժողովի որոշմամբ հաստատված հանրագրի պատասխանն անհապաղ ուղարկում է վարչապետի աշխատակազմ։ Վարչապետի աշխատակազմը ոչ ուշ, քան այն ստանալուն հաջորդող աշխատանքային օրը հանձնաժողովի

5

որոշմամբ հաստատված հանրագրի պատասխանը «Հանրագրերի մասին» Հայաստանի

Հանրապետության օրենքով սահմանված կարգով ուղարկում է հասցեատիրոջը։

21. Հանձնաժողովի նիստի արձանագրությունն ստորագրում են հանձնաժողովի

նախագահը, քարտուղարը և նիստին ներկա հանձնաժողովի անդամները։ Նիստի

արձանագրության մեջ նշվում են օրակարգը, հանրագրի պատասխանի նախագծերի,

ելույթների հակիրճ նկարագրությունը, քվորումի և քվեարկության արդյունքների մասին

տեղեկատվություն։

ՀԱՑԱՍՏԱՆԻ ՀԱՆՐԱՊԵՏՈՒԹՅԱՆ ՎԱՐՉԱՊԵՏԻ ԱՇԽԱՏԱԿԱԶՄԻ ՂԵԿԱՎԱՐ

Է. ԱՂԱՋԱՆՅԱՆ